

潞城縣志卷四

錄一

名宦錄

循良之祀於名宦者稽諸故乘代不數人近世竟無聞焉然或見於文士之載筆或形於父老之謳思亦未嘗不足媲美前哲特豚分享直幸與不幸耳茲錄自晉溫嶠以下竝臚其治績平順故官譜從附見此則備詳名籍僅存無足輕重功德在民多有資於借鑑也述名宦錄第十七

溫嶠字太真太原祁人性聰敏有識量舉秀才補上黨

潞令劉琨深禮之琨遷大將軍嶠爲從事中郎上黨太守加建威將軍督護前鋒軍事將兵討石勒屢有戰功於時并土荒殘寇盜羣起石勒劉聰跨帶疆場嶠爲之謀主琨所憑恃焉成帝初位至開府封始安郡公卒諡忠武

本晉書

右晉一人案晉上黨郡治潞嶠爲令爲太守皆在斯地舊志不列名宦未審據本傳錄入

谷大同字子和濟陰人紹聖中知潞城縣後祀名宦其治績無傳王利用潞川驛記稱其闢西園爲臺池軒洞樂民之樂焉

改舊志

右宋一人案舊志題名有李儀襄垣人令潞城云府志表其爲錚錚者

女奚烈資祿咸平人爲潞城簿平政刑敦禮教吏憚其威民興於行

本通志

右金一人案通志作張資祿入之宋據舊志有典史張資祿云政蹟無考有主簿女奚烈資祿云咸平人從軍有功遷至簿通志誤合爲一人也又金制縣主簿下有尉無典史典史之名實始於元舊志有誤

劉依仁淇人至正間尹潞城治效居一時最繼尹屯留尤以幹濟稱縣有冤獄依仁一訊辨明之民爲立平冤

碑祀名宦

府志

右元一人

張璧蒙城人洪武初年潞城知縣修廢舉墜招撫流移政行期年吏畏民懷祀名宦

本舊志

張璟臨漳人天順間由進士除知縣涖官清慎修學造士尤得人心擢苑馬寺丞祀名宦

舊志

張遇頂城人進士成化中知縣強於馭吏弱於字民政績約見屈詮記中祀名宦

本舊志

案屈詮有修學記已

見學制篇又推官傅景星張公崇祀名宦記云生役治其人既沒食於其地更百祀而民不衰其有顯庸殊勞

攘患招利以賴於後世者與其化成澤久水漬而膠傳
沾濡糾結而不可弭忘者與稷勤農禹勤水人恃其庸
也以祀蜀都於文翁九江於名父邑思其成也以祀非
二物也不在祀典不佞承乏司李天黨李以外寂寂不
見安陽立祀浚儀配社東觀畫像而信陵公子其終與
草木同腐也獨無人推倒淮西碑爭潞東北隅隱隱百
年王氣蔽芾而張君爲政樂不可支之謠迄今沒世不
忘再拜詢之知爲余年友狷小曾王父也案乘志公諱
遇河南秣陵人中嘉靖甲辰進士來知潞城治狀屢積
片石不足詳姑從遺愛不可磨滅中撫拾廉明一二佚

事公告天心事劃地才名崇墉葺學有晉陽保障之思而規模既已宏遠所以鸞集泮宮而甲第聯鑣於范文正公得力在新學校也強於馭吏弱於字民其仁愛著於心油然而達孚顏色矜恤孤羸俾生不爲無藉氓死不作無祀鬼而鵠亭燐火不夜號矣奠赤白祀念壇壝國本所在父老咸婆娑手澤下昔誇萊公柏今且相傳有張公松也至於剖析神明而火燭天光潞之蒨屋窮簷至今猶比屋借照也諸如除煩滌苛發姦釐弊清白自將文章名世尤度越古循良什百尙年魚肥鶴浴卓異聳聞爲聖天子褒美厯官司農亞卿出專民社入領度

支而今且飛鳧闕下賢者果昌其後也是以潞之德澤
一日不斬則潞之歌舞一日弗緩輿情騰躍竟請國典
焜煌而名宦孔光血食一方俎豆萬年朝廷崇功報德
彰教淑人有專祠矣諸卿士大夫田牧販婦屢絡繹躡
或肅衣裾崩角或捧日祝三多或熱篆或指臂矢血誠
或循廊走或流想支頤或目囁鬚眉心運或徙倚低回
於鷄犬舟車廬巷之相觸而悱悱不句遂丐余爲紀於
牲石余轉憶古楊瑒在官廉謹人吏請爲立碑瑒謝曰
吾懼後之人以爲矜也長吏肘銅腰墨南面威福百里
疇能威福百年權招而譽立猶曰才者能之去後何如

哉死後何如哉而公獨曠世相感露草寒蛩松楸千載者果何道以致之哉其招利攘患不可弭忘卓然堪傳於後禩者庸也成也勿替引之也先儒嘗論易咸義咸主感感去心而咸是故列其位於四而著其義於五虛而受誠而感無心而爲萬心轂又誰能外之夫世遠則澤竭事改則業亡惟至誠至虛之體更萬載而未嘗渝茲以類應公尸之祝之蒸之嘗之使後之人過廟思敬過學宮讀碑知天地間人幻相也官傳舍也卽青紫竹帛旂常鼎呂皆優孟衣冠伶盤傀儡而石火電光與時俱盡者也惟瞽宗配享曰庸與成可亘千百祀而不衰

昭往美示來者勸勒石具冥亂之辭賓送以樂神焉辭
曰公淹留兮何者華之巔兮五龍之下漳鳴潺潺兮松
柏娜娜公將皖歸兮不我忘捨蘭肴設兮巫舞蹁神我
降兮龍旂翩右迎神抗修梁兮肅廣除佩長劍兮曳華
裾神具肖兮甯厥居既醉飽兮顏塗朱曾孫來兮製錦
同公無皖還兮樂我新宮右送神

楊盈字守謙章邱人正德間以舉人任知縣剛介明敏
有不可奪之操嚴抑強梗丕變士習爲一時才吏民建
祠於邑之東關嘉靖御史溫如璋改葺之竝爲之記記
曰潞城故有楊公祠予按視三晉屯政已乃訪各郡邑

故實因得悉楊公祠故如是亟命改葺云夫今時守令喜聲好奇美祠且徧郡邑故方直之士愧不舉天下祠而盡撤之若楊公祠則予葺恐不麗且永蓋誠爲真祠也楊公名盈字守謙山東人也號曰雙溪吏潞城三年以憂去三年中復兩遇豪暴上官以私繫立位施政者僅三年所然去之日邑父老多號泣送已乃祠焉夫在昔稱良吏去思如名杜輩書傳不多見然其人率久治若楊公纔三年豈不又爲難哉今世祠者往往出自營陽曰聽民而陰主之不則能得上官歡心或有顯拔乃其邑豪猾者憚遂希意指建焉故率身去而祠毀扁忽

而府讞祠若此類者僞耳若楊公不得安位卽欲自營所不暇然其去也以憂又身多坎壈則邑人相率祠也豈更有所爲哉予嘗考其祠無記夫使豪猾者僞爲之必記然弗記也故父老輩樸實狀祇欲肖其像可羅拜不知所謂文具耳予以此心重之恨不得爲之狀已而按部至雲中會其子東江君巡撫雲中固索公墳志覽焉志所載潞城事爲多諸善政大者無慮數十總之性戇直其政公察廉正一意爲百姓不顧忤上蓋古張景兆楊伯起之儔也予以是知潞民祀公出心慕因又嘆正德間吏多實政下以實感蓋庶幾純遼之風乃益促

葺祠令速完焉庶幾延公芳順潞城百姓心抑且以愧天下官與民相欺爲僞祠者固非爲其子中丞君也

王維垣武清人嘉靖初以進士知潞城值陳睥變官軍失利欲屠邑聚維垣力請於上乃止而招撫脅從安反側其功尤多內遷主事

舊志

李淳濮州人進士嘉靖中潞城知縣嚴明慈惠民有青

天慈母之謠

本府志

劉卓保定舉人嘉靖中潞城知縣秉公持廉法行政舉

遷河州知州祀名宦

舊志

徐元道秦州人嘉靖十二年任平順知縣寬厚恤民有

智略能任事時初設縣治元道悉心經畫城池廟舍數年規模始定致仕去祀名宦 張思聰亦陝人由舉人任歲旱顓誠步禱霖雨三日民賴以生

平順志

李思忠隆德人隆慶中以貢生任潞城知縣清廉慈惠而以殿課左遷士民垂涕送之繼任者爲鍾爵懷柔人

以勤幹稱

府志

唐尙文鄆城人潞城縣丞才猷有爲催徵無擾民甚便之

吳增先盩厔舉人潞城教諭學問宏深操履慎重遷浮山知縣

尤思孝保安人以貢生授潞城主簿有慈惠廉能稱皆

一時表見者也

竝舊志

霍鵬井陘人萬厯中由進士授知縣初宰潞城繼調長子竝有善政志稱其課士勸民事至風生令行雷震獄

訟胥平盜賊屏迹

本舊志

陳九疇厯城人進士萬厯中潞城知縣嘗均徭役民頌其平舊府志稱其古樸廉介撫疲民如嬰兒不求聞達而聲稱自茂升工部主事

舊志

馮惟賢西安人由舉人繼陳任創輯縣志展拓學宮性

寬惠專務禮教政清治平民懷士感

舊志

唐案慶陽人亦以舉人繼任節費省刑懇荒緩征事事出以實心胥役無敢以私擾及鄉民者

本府志

張鶴騰潁州人由進士繼唐任尋調榆次縝密有守兩宰劇地清操惟一擢刑部主事幾不能具道里費士民立祠祀之

舊志

宗孔光山人拔貢生繼張任賑饑鑿池有德於民擢忠州知州祀名宦

本舊志

連元宗公崇祀名宦記朝廷重

民建官內外基布惟宰相得行其道惟諫官得行其言惟長令親敷惠澤與民朝授而夕受焉之獨速也苟非深乎道德之感昭茲來許欲於不及見之後使人愛而

頌之思之無已而神明奉之者蓋其難哉明神宗中興
上陰宗公諱孔而字文潯者來牧潞子若烹鮮墮鷄及
瓜而潞子治公既往矣厥德靡晦弗諉者永譽當年恩
勤鬻閔刈陵之父老子弟皆能道之略而舉焉所謂興
學校修風氣清犴獄撫流移薄征徭在在以疴癢同患
者被諸我師公蒞二載邑人災木饑百姓薪不二次粟
不五春公捐祿買米啖之生活於飲育之下者數千人
卽漢韓穎川之開倉賑流唐張巡之傾貲濟阨不是及
也夫無禾之祲記之春秋君后當之有敬淪之慮而公
能通十二荒政之窮造殘殍予遺之命豈非至德之罔

極也哉繼以覲闕抵長安有爲萋斐謗公者太守曾先生力諫於大冢宰相爭如虎冢宰服之此又尊行之震世者也撫今追昔公之去此有日矣居處笑語之不及思什湮八九矣而流澤焜耀樂利不衰民罔常懷懷於有仁者其何能忘之用時儒紳誕陳懋績讚揚於邑伯申說於郡侯敷奏於督學憲臺咸不以遠迹爲無稽咨詢罔不確許入祀焉於戲盛德感人如響應聲凡以功垂社稷者褒其休祭其柩諡其美天子之不忘其臣猶兢兢也矧哺澤食福者生則榮之去則悲之沒而羣奉薌馨因勒石焉夫豈過哉肆雖閉形於大墓之中而徧